

## REGIONAL NEWS

HEADLINES:-

1. Bangladesh atanga raltlan lo lut mi 126, BSF hovin Bangladesh a an thawn kirte chu Mizoram Police-te kuta hlan turin ruahman mek a ni.
2. Mizoram Police leh Excise & Narcotics department-in kumin kum chanve chhungin heroin kg 80 leh gram 8 an man.
3. President Draupai Murmu chuan vawiin khan Odisha-a Puri khuaah Rath Yatra a hmanpui.
4. Prime Minister Narendra Modia chuan Austria a tlawh dawn a, kum 40 hnua India PM zinga Austria tlawh leh hmasa ber a ni ang

&lt;&gt;&lt;&gt;&lt;&gt;

BANGLADESH REFUGEES

Bangladesh atanga raltlan lo lut mi 126, BSF hovin Bangladesh a an thawn kirte chu Mizoram Police-te kuta hlan turin ruahman mek a ni.

Home Minister Pu K. Sapdanga hnen atanga Akashvani Aizawl thudawn danin raltlan 126-te hi ramri atangin Police-in an va hruai a. An chanchin kimchang an lakkhawm hnu-ah zan dar 7 leh a chanve velah chuan zo felin hemi hnu-ah hian an awmna tur Chamdur 'P' lama hruai tura ruahman a ni. Pu K. Sapdanga chuan BSF-in Mizoram chhunga lo lut tawhte an ram lama an thawn kir leh chungchangah Chief Minister Pu Lalduhoma chuan Home Ministry a a thlen tur thu leh mawh a phurh tur thu a sawi a. Hemi hnu hian nimin khan Pu Lalduhoma hian Delhi-ah Prime Minister Narendra Modi hmu-in hemi chungchang hi a sawipui a. An sahimna zawnga Bangladesh atanga raltlan lo lutte hi Bawm hnam 'Zofate' an nih avangin a thawn kir theih loh thu a hriih a ni, a ti a. Raltlante hi BSF hovin ram pawna an thawnkir luih an nih avangin an lirthei bawh hmanga hruaikir an nih thu Home Minister chuan a sawi a ni.

Home Minister-in a sawi dan chuan Bawm raltlante hi BSF hian nawr kir leh tumin Inrinni khan ramri bul Kamtuli khua-ah an phur kir hman a. Home Ministry atanga thu an hmuh tak avangin BSF hian Kamtuli atangin Chhippui khuaah vawiin tlai dar 4 khan mi 126-te hi phurh thlen an ni tawh a. Chhippui khuaah tihfel ngaite an tihfel zawh hunah khua-in a bumro loh chuan Chamdur 'P' an panpui ang a, state police kutah hlan an ni ang.

Raltlante lo dawngsawng tur hian Lawngtlai bawrh sap pisa atangin Civil officer te leh SDPO-te'n buhfai kengin Chamdur an thleng tawh a. Chawngte SDPO hoin Mizoram Police ten an veng bawh. Bawm zirlai hruaitute leh Tuichawng Group YMA hruaitute pawhin raltlante hi an tawiwam a, Mizoram police kuta an awm hunah an chenna tur an ngaihtuahpui nghal an ni dawn niin Pu K. Sapdanga chuan a sawi a ni.

Kar kalta Zirtawpni zan khan chungkaw 32 ami mi 93 chu Chittagong Hill Tracts atangin Lawngtlai district-a Damdep-2 khua-ah an sahimna zawngin an lo lut a. Heta lo lutte hi mipa 43, hmeichhia 24 leh naupang 26 an ni a. An zingah hian thla 7 mi hmeichhe nausen leh kum khata upa hmeichhe nausen leh mipa naupang kum 3 mite an tel a, tar chak lo leh damlo an awm nual bawh ni a thudawn a ni. Raltlante hi Chittagong Hill Tracts a Happy Hills leh Zulvarawng amite deuh vek an ni a, Bethel, Bethlehem, Arthah, New Eden leh Gethsemani khua amite an awm ve bawh.

Raltlan mi 93 te hi Bangladesh ram chung ngaw hnuai a awm mek, a hma lama BSF-te thawn kir ni a hriat mi 33-te'n an rawn fin leh tak avangin an vaiin 126 an tling ta a. Hemi hma June thla chhovah pawh khan BSF hian Bangladesh raltlan tam tham tak, Lawngtlai district a lo lut tawhte an lo hnar kir leh tawh a ni.

<><><>

#### CRIMINAL LAWS

July ni 1 atanga hman ñan sawrkar laipuiin dan thar a siam, New Criminal Laws of India 2023-ah tunlai thiamna hmangin hnu chhui kawngah leh case chinfel kawngah hmasawna tam tak a awm beisei a ni.

He thu hi Govt. Mizoram Law College Asst. Professor Pi Ruth Fanai chuan sawiin tun lai thiamna hman theih tawh tur chuan Police hnu chhui kawngah leh thubuai chinfel kawngah hmasawna tam tak a thlen dawn a ti a. Dan hriat loh chhuanlam a tlin loh avangin mitin mahni himna tur dan ngaihven a pawimawh tih sawiin khawtlang, zirna in leh Kohhranah thleng pawh inzirtirna kalpui a pawimawh thu a sawi bawk.

Pi Ruth Fanai chuan dan tharah FIR thehluhin a thlen chin report chu Police ten ni 90 chungin a thehluttu an hrih ve a ngai tawh dawn a ti a. He'ng bakah hian dan hmasa lama phal thin Court remtihna a Ukilte'n thubuai kalpui mek an inhnuhdawh theihna chu tihtawp niin a tuartu hriatpuina tel lo in an in inhnukdawk thei tawh dawn lo a ti a. Mimalin misual an lo manin a rang thei ang berin Police station hnai berah emaw police hnenah hruai tur a ni tih dan awmsa chu darkar 6 chhunga hruai tur ti a thlak a ni a ti a. Court-a thuhretu a tangte humhimna dan Witness Protection Scheme a awm tawh dawn a ti bawk. Sawrkar laipui dan thar siam pathum zingah hian hmeichhe humhimna dan tha tak siam belh ni mahse Gender Neutral a rawn awm thar a. Hei hian hmeichhe chunga pawikhawihthu hremna awm thin chu mipa chauh ni tawh lo in hmeichhiate hremna a dah thar a, intluktlang zawkin dan thar hnuai hman a ni dawn tih Asst Professor chuan a sawi bawk.

Pi Ruth Fanai chuan Dan thar 3 chu mipuiten ngaihven a, hriat ve a pawimawh a ti a, harsatna tawh hnuah chiah dan ngaihven loin Dan thar chu mi zawng zawng a huam zau thei ang bera siam anih avangin mipuiten hriat a pawimawh a ti a, Mizo zinga Court-a thubuai lut tam ber chu a tawp hawk chin chiah a nih avangin a tira dan hriat chu mipuite mawhphurhna a nih angin harsatna tawh hnuah ni lo in thil engemaw tih dawnah danhremite zawh thin a pawimawh tih a sawi.

Sawrkar laipuiin July ni 1 atanga hman tura dan thar a duan 3 chungchang sawihona hi Akashvani chuan kartin Inrinni tlai dar 4 atanga dar 4:30 inkarah a tichhuak thin a ni.

<><><>

#### DRUG SEIZURE

Mizoram Police leh Excise & Narcotics department-in kumin kum chanve (January leh June inkar) chung khan heroin kg 80 leh gram 8 an man.

Department pahnih hotute hnen atanga thudawn danin kum chanve chung hian Police-in heroin kg. 46 leh gram 348 an man a, Excise and Narcotics chuan kg 30 leh gram 660 an man a ni. Hemi chung vek hian Police-in methamphetamine kg 89 leh gram 445 an man bakah crystal meth kg 13 leh gram 49 an man bawk a. Methamphetamine mum an man hi a vaiin cheng vaibelchhe 11 leh nuai 63 hu a chhut a ni a. Crystal meth hi a mum ni lovin tengkhang an chi a ni a, a man a to hle a. kg 13 chuang hret hi cheng vaibelchhe

40 leh nuai 47 a chhut a ni. Excise hian methamphetamine kg 112 leh gram 528 an man thung. Ganja hi Police-in kg 112 leh gram 94 an man a, Excise-in kg 418 leh gram 462 an man bawk.

Police department-in tun thla ruk kalta chhunga an ruihhlo man zawng zawng hi cheng vaibelchhe 66 leh nuai 96 hu niin an chhut a. Ruihhlo kaihnawihah mi 270 an man tawh a. Narcotic Drugs and Psychotropic Substances Act, 1985 hmangin thubuai 199 an zia lut tawh bawk a ni.

Hetih lai hian January thla atanga June ni 25 thleng khan Mizoramah ruihhlo vangin mi 42 an thi tawh a, an zing a mi 7 hi hmeichhia an ni a. Ruihhlo vanga thi zinga 31 hi heroin vanga thi an ni a, mi 11 chu heroin leh damdawi dang khawih kawp vanga thi an ni bawk a ni. Excise and Narcotics department chhinchhiah danin kum 1984-a heroin avanga thi 1 an chhinchhiah tan atanga kumin June ni 25 thleng khan ruihhlo vangin mi 1,854 an thi tawh a, an zinga mi 1,630 hi mipa ni-in hmeichhia 224 an thi tawh bawk. Thi zawng zawng zinga 1,161 hi spasmo proxyvon leh parvon spa vanga thi an ni a, kum 2017 atang erawh chuan he'ng na chhawkna hman sual vanga thi hi an awm leh tawh lo thung a. Kum 2015 khan proxyvon leh parvon spa vanga thi 4 awmin 2016 khan 2 an awm a ni. Heroin vanga thi hi 264 an ni a, ruihhlo hrang hrang tihkawp vanga nunna chan hi mi 429 zet an awm tawh bawk a ni.

<><><>

#### PRISON BREAK

Nimin Inrinni a Serchhip District Jail atanga tang tlanhhuak pahnihte chu man leh tumin ngawrh taka zawn mek an ni.

Inrinni chawhnu dar 1:45 vel khan Serchhip Dist jail atangin Myanmar mi 2, June ni 7 a Serchhip Darnam vanga AK-47 silaimu cheng nuai 10 man vel mansak vanga Serchhip Dist Jail, Chhiahtlanga tâng, Lalchhanhima kum 44 Leisen leh Lalnunnema kum 31 Thantlang Myanmar ve te chu zawn mek an ni a. District Jail Superintendent Pu Lalbiakthanga'n a sawi danin Inrinni chhun khan jail chhung kawt laia volleyball ban phun thatna hmanrua vel jail gate chhung zawk pelh, office bungraw dahna a dah feltu zingah Lalnunnema hi a tel a. Tang vengtu be buaiin he'ng mite pahnih hian gate inkhar sa chu nam hawng rawkin an tlan phut a, man bet tuma an pawt chu tal putin, jail atanga khaw chhak lam ruam mau hmunah an tlan liam a, an chappal te pawh an tlansan a. An awm theihna awm Serchhip bul hnai thlam hrang hrangah te nizan zankhua khan zawng kualin, kawng peng thumamah te chhan an ni chungin hmuh an la ni lo a ni.

Lalchhanhima hian AK-47 silaimu hi Myanmar a mipui sipaite hman tura ken chhoh tum niin Serchhipa kan Corr hnenah an tlanhhuah hma hian a lo hrilh tawh a. A thianpa Lalnunnema erawh silai mu chungchang leh mipui sipai tana thawhnaa inhnawihna nei lo, police lokal laia a bula lo awm, an rawn nan chin tak avanga man ve mai niin a sawi.

<><><>

## RATH YATRA

President Draupai Murmu chuan vawiin khan Odisha-a Puri khuaah Rath Yatra a hmanpui. Rath Yatra hi Lord Jagannath, Lord Balabhadra, Devi Subhadra leh Lord Sudarshan te puala siam niin khawvel huap pawha hriat hlawh takani a. Prui-a Grand trunk Road ah heng pathian pathumte puala sakawr tawlailir siam hmanga kawng zawh niin mipui tam tak an pungkawm a ni.

He hun hmang tur hian President Murmu-i pawhin vawiin khan Puri hi a thleng a. Mipui nuai chuang he sakhaw hun paiwmawh hmang tur hian an pungkawm a. Jagannat Temple-a Lion's Gate atangin tawlailirte hi hnuh niin Sri Gundicha temple thleng hnuh thlen a ni ang a. Hetah hian kar khat chungga awm dawn a ni. Odisha sawrkar chuan he sakhaw kutpui thleng tur hian inpuahchahna tha takin a kalpui a. Mi nuai 15 vel kalkhawm tura beisei niin venhimna pawh khauh taka siam a ni a. Sipai platoon 180 chuang dahluh an ni a. President bakah hian Odisha Governor Raghubar Das, Chief Minister Mohan Charan Majhi leh minister dang leh mi pawimawh tak takte an tel dawn a ni.

<><><>

## PM AUSTRIC TRIP

Prime Minister Narendra Modia chuan Austria a tlawh dawn a, kum 40 hnua India PM zinga Austria tlawh leh hmasa ber a ni ang. Austria Chancellor Karl Nehammer chuan karleha Prime Minister Narendra Modia'n Vienna a lo thleng tur chu an nghakhlel hle tih social media ah a sawi a. Pu Modi'n Austria tlawh tur chu an tan a hlu hle tih sawiin kum 40 hnua India PM in an tlawh leh vawi khatna tur a ni a ti a. Hei bakah hian India leh Austria te thawhdunna kum 75 tlin champha a ni dawn tih a sawi bawk a. Hun lo kal turah ram pahnihte inkarah inlaichinna tha a awm belh zel a beisei tih sawiin thawhdunna tha tak tak nei tura an inbiak ngei a beisei a ti bawk. Prime Minister Modia pawhin Austria Chancellor hi lawmthu hrilhin Austria a tlawh thei tur chu hun chhinchhiahtlak tak a ni dawn ati a. Ram pahnih inkar ti nghet zual turin inbiakna hun tha tak an hman a beisei a ta. Mipui rorelna democracy, zalenna leh dan hnuaia rorelna chu an inngahna anih avangin an inlaichinna pawh a hma aia tha zawkin an siam a beisei thu a sawi a ni.

<><><>